

DISSERTATIO III.

tate componi posset, non video: & tamen tempore D. Augustini hæc apud catholicos adhuc impunè versabatur controversia, quemadmodum & alia de animæ origine, ac præexistentia. Concilium tamen Lateranense sub Leone X. aperte definit „animam humanam pro corporum, quibus infunditur, multitudine singulariter multiplicabilem, & multiplicandam „.

574 Restat igitur per id tempus recepta apud theologos, ac philosophos opinio: humanas animas eo tempore creari, quo humanum corpus conformatur in conceptione, postquam in materno utero materia aptè est disposita, ut anima functiones vitales exercere incipiat. Et quidem anima ens simplex (84), substantia spiritualis (530) ac individua (536), nonnisi per creationem oriri potest (88): ex dictis autem ejus præexistentia nullo innititur fundamento: ergo in conceptione hominis a Deo creator. Quo autem id momento eveniat, nec ad metaphysicam spectat definire, nec, si physicos audias, magis profeceris, ut suo loco exponetur.

575 Rursum alia incidit quæstio, utrum animæ ad eamdem, an ad diversas species pertineant? Mihi quidem nulla sufficiens ratio occurrit, cur hanc specificam diversitatem inducere velint. Si enim aliqua diversitas inter hominum facultates spirituales intervenit, non continuò ab intrinseca substantiarum differentia oriri putanda est. Conformatio enim illa organorum satis superque causa esse potest, e qua major, aut minor energia animorum temperetur; ut in eodem homine in diversa vita statibus considerato planum est contemplari. Quantum enim infans a puerō septenni distat? hic ab adolescenti, adolescens a viro, hic tandem ab sene decrepito? In eodem etiam trætu aetatis homo valens, quantum differt a se agrotante, amente, aut febri delirante? Quot homines incultos ferarum more vitam transegere, qui deinde doctrina exculti politissimum quemque aquarent? Demum cum unitate generis humani agè potest hæc diversitas conciliari, ut facile perpendenti patebit.

576 Humanam mentem semper cogitare, Cartesii singularis est opinio, quam plures a Cartesio alieni etiam amplexi sunt. Ratione quidem probare animam cogitationem esse, aut saltem perenni cogitatione, quasi aetuum vitalium continua serie conservari, res est ardua, nec facile demonstranda. Quod enim ajunt, vitam humanæ mentis in vitalibus ejus actionibus consistere, adeoque, quamdiu vivit, aliud agat, necesse esse: obscurum obscuriore ratione probare est, aqæ controversa quidem certè. Fœtum in utero matris, dormientes, apoplexia, aut aliis morbis sensum penitus adimentibus laborantes

PSYCHOLOGIA.

perenni cogitatione versari, agè quidem concipere possumus. Quidquid sit de hac opinione, quam definire non intendimus; nec enim me pudet fateri nescire, quod ne- sciam; certum est, animum in statu activitatis positum continent cogitatione versari, quin in manu nostra sit, ejus energiam ita suspendere, ut queat omni penitus cogitatione privari.

CAPUT ULTIMUM.

De Anima Brutorum.

577 Quærenti mihi, multumque & diù cogitanti, quan- nam via præsentem de anima brutorum tractationem ar- riperem, controversiamque resolverem; tot tantæque dif- ficultates animo obversabantur, præsertim ab recentium philosophorum lectione, ut animum prorsus desponderem, non veritatis tantum assequenda, quod numquam fore speravi, verum etiam magis probabilia inveniendi. Quam- obrem aut silentio premere hujusmodi inquisitionem pu- tabam magis expedire; aut pauca de arguento præfatus, illa perbrevi sententia discedere:

*Corpora Brutorum, que sive carentia sensu,
Sive instructa putes, mirare, & Numen adora.*

Et quidem eruditus Antonius Nicolajus postquam omnia qua haecnenus disputata sunt, more suo doctè collegisset, rem desperatam esse pronunciat, problema resolvare (tom. 2. lect. 13. in Gen.) Ne tamen jejunam nostram juventutem in hac metaphysica disputatione dimittamus, ea, quæ ab empirica parte habemus probabiliora, exponemus; cetera historicè magis, quam disputantes dabimus.

578 Ad opiniones quod attinet diversas, serè dici posset, quemlibet auctorem novam quamdam sententiam proponere; adeo diversæ sunt via quibus incedunt, quam- quam opinionem ab aliis promotam defendant. Ceterum ad quinque classes commode refetri posse observat Tama- gna; imò ad duas, ut statim dicemus, reduci deberent. Alii spiritualem substantiam cum prælaudato auctore esse propugnant; peripatetici substantiam materialem ex ipsa materia eductam, ac instinctu quodam præditam; alii vero tenus ab his dissidentes, substantiam corpoream existimant; a quibus tamen si quid exprimere velis, quod clarius, ac distinctius hujusmodi substantiaz corporeaz no- tionem exponat, fortasse nihil aliud dicent, quam modifi- cationem esse materia: per hos autem dies vulgatior illa est

DISSERTATIO III.

est opinio, substantiam esse *immaterialē*, quæ nec corpus sit, nec spiritus; iis tamen qualitatibus prædicta sit, quam, si rationem, ac invidiam verbo demas, spiritum esse concedant. Demum Cartesius a Gomezlo Pereira medico hispano primum in suo libro, cui *Margarita Antoniana* a parentum ipsius nominibus titulo est, propositam sententiam novis accessionibus illustratam defendit; esse scilicet bruta *automata* quædam naturalia horologis, aut machinis artificialibus similia, quæ nullo interno principio agente, sed vi externaliorum objectorum concutiente organa, ea præstant, quæ in ipsis animadvertisimus: infra hanc sententiam verbo tenus a peripatetica differre, a recente auctore discemus. Jam sit

579 Positio ima. *Bruta animantia automata naturalia non sunt, quæ omni interno agendi principio destituantur.* Prob. 1. Si mechanici in brutis motus existunt, ut sunt illi in magnete, horologio &c. constantes esse debent effectus, quemadmodum mechanicorum automaton esse conspicimus: enimvero hoc falsum esse, quotidiano experimento comprobamus. Esto exemplum equus perniciosissimo motu concitatus, aut canis venaticus effuso cursu prædam insectans, qui fovea latissima conspecta statim cursum sistent, aut flecent: fas alium equum, aut canem Regiomontani artificio constructum, qui hujusmodi cursum imitetur; sistente, aut aliud sponte divertet, quum ad foveam devenerit? non puto diversa igitur est utriusque interna constructio, atque aliunde, quam a mechanica dispositione petenda ruina declinatio, quæ non nisi a principio intrinsecus agente oriri potest.

580 Ab effluviis, inquiunt, voraginiis in organa canis agentibus repentina hujusmodi cursus compressio, aut inflexio nasci dicenda est; quemadmodum Regiomontani aquila volans, aut avicula in Justano secessu Caroli V. Imperatoris, Famiano Strada teste de Bello Belgico dec. 1. ad ipsum recreandum fabrefactæ, quæ per conclavia volitabant, ab interno machinamento ad id determinatae. Si hac, inquam, vera est responsio, deberent motus leges ad amussim servari in primo casu brutorum, veluti horum automaton motus ad easdem conformabantur: hoc autem nullo negotio falsum ostenditur; nam vel effluvia æquali motus quantitate occurrent equo, aut cani, aut tum sisti omnino deberet motus; vel maiore, & retroagerentur; vel directionibus obliquis, tumque juxta diversitatem virium motus componi deberet: nullum ex his contingere videmus, sed in quocumque casu sistunt, aut si flecent viam, id, postquam omnem motum primitivum extinxerint, faciunt. Deinde si obscura id nocte eveniat,

quan-

quando objecta discernere non valent, præcipites aguntur, quin ulla effluviorum emissione detineantur, ut nuper curru iter agenti per noctis tenebras contigit.

581 Prob. 2. Si internam brutorum constructionem inspiciamus, organa, prout cujusque moles, & conformatio corporis fert, nostris simillima conspiciuntur, quæ & motus peragunt vitales, & nervorum ministerio ad cerebrum usque sensionesvehunt iisdem prorsus legibus, quas in nostris externis sensibus observari conspicimus: at si umquam analogia argumentum aliquid evincit, tum vel maximè id præstare debet, quando, attentis omnibus circumstantiis, paria omnia utrobique inveniuntur. Quum ergo ex intima conscientia nobis constet, ab interno principio in nobis hæc omnia oriri, quæ ministerio organorum aut agimus, aut patimur; & in brutis aliquid internum principium id præstans agnoscere debemus.

582 Prob. 3. Cani recumbenti fistum panem, aut carnis frustum ostenta: occurret statim; fraude tamen detecta, iterum recumbet; fortassis etiam bis, terve decipies; dolum tamen sèpè continuare non poteris. Quid ergo? effluviane illa machinam amplius non percitant? in modo vero eo magis excitare deberent, quo plus temporis in conspectu canis sunt: tantum autem abest, ut iis pervellatur, ut iteratis vicibus repetita fraude, nec oculos amplius in panem conjiciat. Evenirentem idem in machina *hydraulico pneumatica*, aut elaterio, rotis, similive machinamento constructis? enimvero si iisdem causis mechanicis, idem semper effectus respondent, uniformes actiones brutorum obtinerentur in præfigurato casu, aliisque similibus: quod quum falsum sit, & assignata causa mechanismi commen-titia sit necesse est.

583 Prop. 2. *Bestiæ sentiendi facultate pollut.* Prob. Omnes machinæ animalis motiones, quas in nobis a facultate sensitiva provenire cognoscimus, in belluis animadvertisimus: enimvero si, ut fert nevtonianum philosophandi dogma merito a philosophis receptum: effectuum naturalium ejusdem generis eadem sunt causa admittenda, non video, cur brutis sentiendi facultas denegetur, quæ omnia exhibent, quandoque etiam perfectiore modo, quæ a facultate sentiendi nos ipsi prestamus.

584 Prop. 3. *Bruta etiam percipiendi, seu cognoscendi facultate pollut.* Prob. eodem arguento, quo præcedentem conclusionem firmavimus; eadem enim utrobique est ratio, idem effectus spectabiles cognitionis, ac in homine conspiciuntur; quin opus sit rhetorica quadam amplificatione ab inductione id ostendere, quod omnibus notum, ac perspectum est. Nec enim rethores, sed philosophos agimus: philosophos, inquam, juvenum institutioni ser-vien-

DISSERTATIO III.

vientes, ac pressam illam, ac tempori studiorum præfixo accomodatam methodum seftantes, quæ non ab eloquentia laude, ac ornamenti dimetienda venit, sed a concinna, pressaque claritate, qua multa paucis comprehenduntur, seposita redundantia verboium. Qui animi causa velit de brutorum anima tractationem jucundam legere, aedat Polignacum Antilucretii lib. 2.

585 Prop. 4. *Bruta pollent facultate imaginandi.* Prob. Imaginatio est facultas sensationes præteritas renovandi (332): in bestiis autem quotidiano experientia novimus, hujusmodi sensationes renovari; dominum canes agnoscunt; faste ostentato, fugiunt; latibula feræ querunt sua; repositas escas urgente fame iterum revisunt; aliaque permulta edunt imaginationis signa, quibus luculententer ostendunt, eam ipsis inesse vim, quam nos imaginationem vocamus. In somniis etiam phantasmata in brutis renovari manifestè deducimus.

*Quippe videbis equos fortes, quum membra jacebunt,
In somniis sudare tamen, spirareque sæpd,
Et quasi de palma summas contendere vires,
Tunc quasi carceribus patefactis sæpd quiete,
Venantiumque canes in molli sæpd quiete,
Iactant crura tamen subito, vocesque repente,
Mittunt, & crebras redducent naribus auras,
Ut vestigia si teneant inventa ferarum.*

Lucr. lib. 4, v. 984.

586 Corol. 1. Quoniam ab imaginatione, & cognitione memoria pendet (572), easque facultates in brutis reperiri ostendimus, memoriam etiam, seu reminiscientiam habere possunt. Et quidem excitata phantasmata recognoscunt, ut in aliatis exemplis aliquique sexcentis maxime obviis elucet manifestum. „Habent enim memoriam, ait Augustinus, & pecora, & aves, aliqui non cubilia, nidos repesteret, non alia multa, quibus assuescunt; neque enim assuescere valerent, nisi per memoriam. „Lib. 10. Conf. c. 10.

587 Corol. 2. Appetitu etiam sensitivo gaudere jam alibi pro re nata (457), deduximus. Dedit autem eadem natura bellus & sensum, & appetitum; ut altero conatum haberent ad naturales pastus capessendos, altero secererent pestifera a salutaribus. Tull. lib. 2. de Nat. Deor. c. 47. Legi possunt cetera, quæ ibi persequitur Balbus, & magnopere haec tenus exposita de belluarum anima illustrant, atque confirmant. Hinc & affectus (478) suo modo brutis convenire, ex eorumdem etiam operationibus inferimus: nam & ira exardescere, vindictam appetere, ad præ-

PSYCHOLOGIA.

sentiam objecti grati gestire, amore erga prolem teneri, blanditiis mulceri etc. passim videmus. Quamquam acute observat Seneca in belluis hujusmodi commotiones statim sedari, taurosque post acrem pugnam ad pastum, somnum que capessendum accedere; quod homini facere numquam licuit.

588 Corol. 3. Spontanei motus, qui ab appetitionibus atque aversationibus proveniunt, existunt etiam in brutis: motusque ipsos pro varietate appetitionum aut aversationum excitant, intendunt, temperant, sistunt; plura deinde in ipsis animadvertisimus, quæ tam parum mechanice fieri posse concipiimus, quam in nobis ipsi eadem simili automatico modo peragi concipiamus.

589 Prop. 5. *Bruta intellectu, ac ratione destituantur.* Prob. Intellectus est ea animi facultas, qua notiones distinctas formamus, notas objectorum separando, conferendo &c. (381) sed hæc facultas brutis non inest: quod sic ostendo: bruta notiones abstractas non formant; genera, species, similitudines, relationes non pervident: notionibus igitur distinctis carent. Deinde hujusmodi notionibus distinctis instructus homo signa arbitria invenit, quibus eas significaret, cum aliisque conferret: bruta autem id præstare numquam possunt, imò nec addiscere ab homine inventa vocabula, quibus notiones suas exprimant. Aliquos quidem sensu vacuos sonos edunt, et cognoscunt, tamquam signa quædam externa sensus commoventia: annexam tamen mentalem ideam in mente humana ab his signis excitatam, in ipsis perfici non posse perspicuum est; velut in surdis, talia signa haud percipientibus, fieri videmus.

590 Conf. Ratione singulares veritates in universalibus contentas percipimus, ac deducimus (393): autem hoc bellus efficere nemo umquam dixerit: ratione igitur carent. Nisi velis geometriam, aut analysis invenisse, aut invenire posse bruta: aut aliquod problema soluisse; quod quidem axis magis a pueris oppugnaretur, quam ratione aliqua philosophica. Deinde quas artes ratione ducti invenerunt, quas perfecerunt a natura datas? nullas: ratione igitur carent.

ARGUMENTA CONTRARIA.

591 Argum. 1. Sapientissimus naturæ Artifex potuit tales machinas condere, quæ sola structura peragerent, quæ a brutis fieri videmus: ergo ita factum esse credendum est in illis, ne difficultatibus opprimatur, quæ ingenia torquent illorum, qui corporeos, aut spirituales, aut immateriales esse propugnant. Prob. cons. breviorē semper mo-

DISSERTATIO III.

modum operandi insectatur natura: ergo si solo machinamento res fieri a Deo potuit, nihil opus est animam adstruere huius machinae adjunctam. R. Omissio ant. neg. cons. Nihil nostra interest investigare, quanam Deus potuit facere circa belluarum conditionem; eodem enim iure ex illo antecedente contraria conclusionem deducere possemus. Potuit enim condere et anima facultatibus instructas: ergo et condidit. Ad unum hoc deveniendum tandem est, utro modo ab effectis Deum operatum esse deducamus? ajo enim verisimilius esse ex his, quas attulimus rationibus, ac ferè omnis humani generis conscientie, bruta animantia mera automata non esse, sed principio agendi interno pollere, e quo proficiscantur, quæ ab ipsis fieri videmus. Si enim nullius roboris illæ sunt, ajo te merum automa esse, nullaque ratione evictum iri contrarium. Nam si ad conscientiam recurras, hæc mihi tam est manifesta, quam illa sit, quæ belluarum animæ insidere posset. Ad prob. respondeo, quanam brevior, aut longior sit via, nostrum non esse judicare; nec etiamsi hæc præ illa longior foret, cur a Deo citius electa fuerit, possumus, nisi temerè, definire. Alio igitur argumentandi genere res est a cartesianis peragenda.

592 Arg. 2. Si bruta automata non sunt, crudelitatis Deus arguitur, qui tot laboribus, cruciatibus, nece permisit homini bruta impunè afficeret: hoc impium est dicere: ergo primum tenendum. R. neg. maj. nam sensaciones brutorum conferre cum nostris non debemus, ut ex his, quæ nobis acciderent in simili casu argumentum instituamus. Suas voluptates habent bruta, quibus abunde compensantur dolores, quos perferunt. Consilia Dei adorare debemus, neque iis ad nostra præjudicia promovenda abiuti. Qua de causa Deus homini permisit dominium *absolutum* in bruta, noverit ipse, nec nos curiosus scrutari debemus consilia sua. Plura sunt, quoruri & causæ antecedentes, et effectus subsecuturi nos latent; quæ si introspicere liceret, rationem sufficientem statim adipisceremur eorum, quæ latebris sunt involuta natura. In his ego brutorum statum recenso, quorum ulteriorem destinationem nemo est, qui, nec divinando, assequi valeat.

593 Arg. 3. Si brutis inest facultas cognoscendi, etiam intellectus, ac judicandi & ratiocinandi facultas concedi debet: falsum posterius: ergo & prius. Prob. maj. ab effectis facultatem cognoscendi deducimus: sed ab iisdem etiam plura ad rationem pertinentia a bestiis fieri conspicimus. R. neg. maj. & dist. maj. prob. ab effectibus, & quia nulla ratio evincens contrarium appareat, cono. secus, neg. maj., Inter hominem, & belluam hoc maximè in-

te-

PSYCHOLOGIA.

335

terest, quod hæc tantum, quantum sensu movetur, ad id solum, quod adest, quodque præsens est, se accomodat, paululum admodum sentiens præteritum, aut futurum. Homo autem, quod rationis est particeps, per quam consequentia cernit, causas rerum videt, earumque progressus, & quasi antecessiones, (De Offic. lib. 1. cap. 4.) „ Homines enim etsi aliis multis, tamen hoc uno a bestiis plurimum differunt, quod rationem habent a natura datam, mentemque & acrem, & vigentem, celestremque multa simul agitantem, & ut ita dicam, sagacem: quæ & causas rerum, & consecutiones videat, & similitudines transferat, & disjuncta conjungat, & cum præsentibus futura copulet, omnemque complectatur vitæ consequentis statum. Eademque ratio fecit hominem hominum appetentem, cumque is natura & sermone, & usu congruentem, ut prosector a caritate domesticorum ac suorum serpat longius, & se implicet primum civium, deinde omnium mortaliū societate; atque ut ad Archytam scripsit Plato, non sibi se soli natum meminerit, sed patriæ, sed suis, ut perexigua pars ipsi reliquarit. Et quoniam eadem natura cupiditatem ingehuit homini vera inveniendi, quod facilimè appareat, quum vacui euris, etiam quid in calo fiat scire avenus: his initii inducis omnia vera diligimus, id est fidelia, simplicia, constantia: tum vana, falsa, fallentia odiimus, ut fraudem, perjurium, malitiam, injuriam. Eadem ratio habet in se quiddam amplum, atque magnificum ad imperandum magis, quam ad parendum accommodatum: omnia humana non tolerabilia solum, sed etiam levia dicens, altum quiddam & excelsum, nihil timens, nemini cedens, semper invictum. „ De Fin. lib. 2. cap. 14. Nisi hæc in bestiis adesse probaveris, rationem ipsis convenire numquam evinces.

594 Inst. Rationes haec tenus adductæ, ut bestiis intelleximus negemus, sunt 1. quia sermone destituuntur. 2. quia hominum loquela numquam addiscunt. 3. quia artefacta sua non perficiunt, nec artes novas inveniunt. 4. constans ubique terrarum operandi modus, contra atque in homine cernatur ratione ductus: sed hæc falsa sunt: probant: 1. sermonis defectus ab organorum conformatione dependet, quibus si instruxta essent bruta, æquè ac homines loquerentur; quod patet in canum latratu, gallinarum articulationibus pullos convocabantium &c. 2. vocabula plura probè distinguunt canes, feles &c. nomina sua cognoscentes. 3. indubium est animalia quædam saltationem, venationem, aliaque addiscere magisterio hominum edocita. 4. varietas illa in homine perfectiore rationem tantum probaret. R. Animalia quædam, ut psittaci voces proferre humanas, ac integras sententias, quin umquam sermo-

ci-

DISSERTATIO III.

cinandi rationem adinvenerint. Quædam etiam verba a canibus magisterio edictis prolatæ fuisse, memini quondam legisse: defectus igitur rationis, non organorum est, quod muta animantia facit. Ad 2. & 3. quod attinet, rationem in brutis nullam probant, quum hæc a facultatibus imaginandi, ac percipiendi etiam in homine provehiant, ut in amentibus, infantibus, dormientibus, noctambulis præsertim evenire videmus. Demum nulla est ratio, quæ cultura non perficiatur: si uniformitas ista in actionibus humanis, qualis brutorum operationibus inest, cerneretur; actum esset de ratione nostra.

595 Inst. Plura sunt, ex quibus, bruta ratiocinari, manifestum est: ergo ratione utuntur. *Prob. ant.* exemplo canis prædam insequentis, qui quum ad trivium devenerit, odoratus primam, ac secundam semitam, tertiam confidenter arripit; quasi hoc ratiocinio ductus: aliquam ex tribus his semitis arripiuit fera: non primam, ac secundam: ergo tertiam: quis autem negaverit, hoc esse perfectum ratiocinium? R. hujusmodi ratiocinium ab homine hæc observante, minimè vero a cane perfectum fuisse. Prima, ac secundam viam odoratus, ad tertiam deviens, ab odore organa percellente excitatus fuit ad tertiam semitam arripiendam. Ni ita fuisset ratiocinium, ajo dignum fuisse, quod a rationis experte perficeretur. Aut enim illam viam institerat præda, aut aliam arripiuerat: si primum dixeris, in nostram responsonem incidit: si alterum, næ hujusmodi ratione uti ego nolle. Fac tamen, ita evenisse, inquies; falsam ratiocinationem evinces fuisse, aliquam tamen. Nullam, inquam, etiam concessò, quod ab odore non traheretur. Potuit enim a reminiscencia id evenire; quod alii similius casuum expectationem vocant (402): si prædam olim insquens canis in trivium delapsus, prima ac altera semita odorata, in tertiam deviens, odore admonitus, præda potitus fuit.

Ceterum narratiuncula istiusmodi plerumque falsis adjunctis adornata sunt. Mira sane apud Plutarchum in lib. de industria animalium legitur: tale est illud: „Thraæ etiamnum flumen glaciatum transituri, non aliunde, quam a vulpe documentum capiunt prius. Leniter hæc super glaciem incedens auriculam admovet: ac si strepitum subterlabentis aquæ captando assequi potest, non satis altè, sed tenuiter & invalidè fixam colligens, sistit gradum; ac nisi quid vehementer urget, nusquam promovet pedem: strepitum vero postquam audire nullum potest, sumptis nimis trajicit”.

Auctor libri de sermone brutorum hanc aliam narratiunculam profert. „Pastor quidam a viatore monitus, ut sibi, gregique suo a lupo non procul excubante caveret;

re-

PSYCHOLOGIA.

respondit, nullum imminere periculum gregi, quamdiu canes penes se contineret; sin autem eosdem emitteret aduersus lupum, quem viator vidisset, mox adfuturum prædonem alterum, qui nonnihil remotius in insidiis latet. Istud experiri volens viator, damnum, quod accideret, suum fore pollicetur, modo canes emittantur. Obtemperat pastor: at ubi canes in lupum jamdiu conspectum effusi longius a grege recedunt, ecce tibi lupus alter, qui statim in gregem involans, ovem secum abripit, cursuque pernicissimo prædam laniaturus aufugit.”

Hæc, inquam, mirandaque apium in construendis cellulis industria, fibrorumque seu castorum solertia architectonica, rapacium animalium astutia, ac insidiæ militares &c. nonnullos auctores impulerunt, ut animantibus rationem quamdam imperfectam concederent, quæ ad notiones abstractas minimè perveniret: eas tamen, quæ a sensibus hausissent, & perpendere, & conferre, disjungere, aut separare judicio quodam comparativo, ac ratiocinatione valeret. Ea tamen a facultate cognoscendi, imaginandi, appetendi, quas in brutis reperi, si cartesianos demas, omnes admittunt, provenire posse, puerorum exemplo, amentium, imò dormientium etiam, qui plura his similia exhibent rationis indicia, ostendi posse videtur. Ceterum si hanc imperfectam rationem nuncupare placet, nullus contradicò.

596 Corol. 1. Igitur bestiae nonnisi singularium corporum ideas in sensu incurrentes acquirere possunt; abstractas, universales, immaterialium objectorum non possunt. Procul exultat ab eorum cognoscendi facultate notio Dei, justi, honesti, virtutis, vitorum, quantitatis discrete, proportionis &c.

597 Corol. 2. Libertate etiam carent bruta, quæ rationis exercitum requirit, ac judicium indifferens extrema, inter quæ eligat, comparans, bonitatis etiam notionem, a qua excitetur, que omnia ab agente rationis compote tantum ad manum haberri possunt. Motus quidem voluntarios in ipsis admittimus, quemadmodum illi suat in infantibus, puerilis, amentibus conspicui, atque a facultate appetendi, nulla dirigente ratione, profecti; directio[n]em majoris, aut intensioris sensationis in omnibus sequentibus.

598 Schol. Quod si quis a me querat, cuius tandem generis esse animam brutorum existinem, spiritualis, corporei, aut immaterialis? Ingenuè fateor, me ignorare, nec pudet meam ignorantiam candidè aperire. Auctores illi, qui animam brutorum corpoream esse contendunt, in eas salebras devenerunt, ut materia percipiendi facultatem, imò & cogitandi concederent. Audi Joan. Bapt. Du-hamel:

mel: „ Oppon. i. nihil esse in brutis, nisi corporeum, & extensum; sed cognitio, aut perceptio non est corporea, neque affectio, aut modus rei extensæ, quum ea nec dimensiones habeat, nec figuram; neque enim perceptio, aut cogitatio quadrata, vel rotunda, ut nec longa, nec lata concipi potest: ergo &c. . . . Resp. neg. maj. nam quæ in brutis fit perceptio, est corporea, & extensa, quum nihil nisi corporeum, & per imagines corporeas percipiunt „. Deinde pluribus interjectis disertius hæc habet: „ Quo quidem modo extensio non erit cogitationis subiectum; sed substantia, quæ est extensa, potest eadem cogitare „. Metaph. tract. 3. quart. 5.

Felicius se expeditisset Duhamelius cum Ant. Ludenna, peripateticorum, Cartesii, ac suam de anima corporea brutorum unam faciente sententiam. „ De anima (brutorum) tres potissimum sententias numerantur, quarum prima peripateticorum fuit, qui brutorum animas formas quasdam substantiales esse censerunt, corporeas illas quidem, sed a materia prorsus secretas, quæ ne crearentur, nec ex nihilo sui gignerentur, sed ex materia, tamquam ex subiecto quedam, quemadmodum ceteræ qualitates accidentales corporis, efformarentur . . . Verum hæc quidem opinio vix ab ea differre credenda est, quæ brutorum animas corporeas facit. Nec enim vires formæ substantiales vires absolutas materiæ superant, ac aliquod medium inter vires materiæ, & spiritus reperitur . . . Postrema denique illorum philosophorum opinio est, qui brutorum animas corporeas esse, nec prorsus a materia secretas existimant: quam sententiam instauravit in Hispania omnium primus Antonius Pereira medicus peritissimus in sua *Margarita Antoniana*, quem postea Cartesius in Gallia imitatus fuit, atque ita illustravit, ut ab eo tota quæstio nomen acceperit. Quapropter effectus omnes, & operationes omnes, quas in belluis, mutisque animalibus experimur, ex diversa solum organorum dispositione, diversaque rerum corporeatum impressione repetendas esse censerunt.

Deinde suam mentem aperiens, cum peripateticis, & cartesianis asserit, animas belluarum corporeas esse. „ Itaque brutis quidem concedimus tum sentiendi & imaginandi vim; tum motus quosdam spontaneos motionibus, & imaginibus corporeis accuratissime, & necessariò respondentes; quæ tamen vires, etsi vim percipiendi imitari quodammodo videantur, certè nihil aliud sunt, aut fingi possunt, nisi quedam modificationes materiæ per motum, & corporum impressionem effectæ, eorumque veræ imagines; aptæ tamen, & mirum idoneæ ad ipsos motus inducendos, quos ipsæ animi motiones inducerent. Similes namque sunt, ipsaque objectum referunt, neque alia re diffrunt,

fuit, nisi principio, & ratione, & temporis diversitate, quo fiunt, quemadmodum supra monstratum est: nec nimis propterea quod amba a Lockio permixta, & copulata, nec interpositum fuerit aliquod inter ipsas discrimen. Et verè res ejusmodi erat, ut discriminem totum internosci non posset ex solis animi corporisque motionibus. Quare si in brutis Lockii opinionem teneamus, hec quidpiam bruta nisi res corporeas & concretas percipiunt, sensusque omnis belluarum motionis corpora effectus sit; num quidpiam ex hujusmodi perceptionibus evinci poterit, quod vim materiæ & potestatem superet? Itaque bruta verè sentiunt, & percipiunt, ut motionibus solum corporeis pertulantur, & afficiantur, quemadmodum in Lockii opinione animus: res alias ab aliis distinguunt, & separant: at per diversam solummodo impressionem sola motione corporea effectam, ut per diversam objectorum imaginem: rerum singularum cognitionem obtinent; at nullam claram, & distinctam ipsarum ideam, & notionem habent: motus quosdam in ipsis spontaneos & voluntarios, nec eosdem constantes, & invariabiles observamus, qui tamen veri effectus sunt illarum imaginum, quæ in ipsorum phantasia sensuum motionibus excitantur, ipsisque respondent accuratissime: quæ omnia ejus generis sunt, ut vires, modificationes materiæ non excedant, nec apta partium dispositione, & figura explicari queant. „ Metaph. lib. 3. c. 8.


Haud ægrè patiar in primam docti hujus auctoris opinionem trahi, tres scilicet illas sententias ratione quidem consentire, oratione pugnare asserentis. In eam namque sententiam jampridem descendenter, peripateticorum formas materiales, puras putas esse modifications materia recentiorum alio nomine donatas. Verum ne partem alteram ejusdem sententiae amplectar, aliquot impedior difficultatibus, quæ nisi mihi endentur, nullam inire sententiam satius duco. Ac primum sensatio illa, perceptio, imaginatio, distinctio objectorum, quas brutis concedit laudatus auctor, metaphorico tantum sensu accipienda erunt; nec verè bruta sentire, percipere &c. ullo umquam pacto affirmare licet. Quis enim horologia, Regiomontani aquilam ligneam, machinas illas a P. Regnault commemoratas, equi videlicet mechanici ad septem, vel octo leucas in via plana conscientis, statuæ ferreae a captivo quodam elaborata, quæ per varias tortuosas vias incedens, ad pedes Regis Marrochii supplicem exhibens libellum, ad carcerem iterum reddit &c. verè percipere, sentire, motum spontaneum habere dicat? Inter hujusmodi machinas, ac bruta sensu prædicto fabrefacta illam ego diversitatem invenio, quæ inter antiqua illa horologia

DISSERTATIO III.

rudi minerva constructa, ac recentia hujus automatis machinamenta reperire licet. Nam etiamsi artificium naturalium automatum, utpote a mente divina profectum toto cælo ab humano distaret; semper tamen in materia diversimode configuranda versaretur; nec alterum ab altero, nisi penes magis, & minus, ut ajunt, diversum esset.

Deinde sensatio illa, perceptio &c. essetne cum intimo sensu conjuncta, ac intimo sensu percepta? Intimum hic sensum eum intelligo, quem infantes, pueri, amentes sensationum suarum habent. Si hunc illis concedas, materiæ notiones tribuis, quibus concessis, ipsam cogitare posse fatearis, oportet. Sanè quomodo hic sensus intimus materiae convenire queat, haud facile intelligo. Sagacioris ingenii alii fortasse id percipient; mihi quidem hucusque non licuit mirabile hoc arcanum animo comprehendere. Sin autem sine intimo ullus sensu phænomena illa edere contendas, verè sentire, percipere, imaginari &c. nisi abusivè, dici quidem certè non potest.

Demum, admissa mechanica illa sensatione in brutis, nullo arguento in homine ab anima provenire sensations, appetitiones, phantasiam &c. ostendere valemus; duoque principia, sive duas animas, corpoream unam, spiritualem alteram configgere quisque pro libito poterit. Exemplo enim a belluis dueto, hominem ab anima corporeo sentire pronunciabit; ab spirituali verò rationem, ac ejus appendices habere dicet; quod nescio, an docili mente omnes auscultabunt. Luculentius Balbus in 2. de Nat. deor. c. 11, et 12, animam brutorum sic expedit: „Omnem naturam necesse est, quæ non solitaria sit, neque simplex, sed cum alio juncta atque connexa habere aliquem in se principatum, ut in homine mentem, in bellua quiddam simile mentis, unde orientur rerum appetitus... Bestiis autem sensum et motum, (natura) dedit, et cum quodam appetitu accessum ad res salutares, a pestiferis recessum; hoc homini amplius quod addidit rationem... Sed hæc haec tenus.

DISSERTATIO IV.
THEOLOGIA NATURALIS.

Liceat cum Cordubensi Philosopho præfari. „Equidem tunc naturæ rerum gratias ago, quum illam non ab hoc parte video, quæ publica est, sed in secretiora ejus intravi: quum disco, quæ universi natura sit, quis auctor, aut custos: quid sit Deus: totus in se intendat, an ad nos aliquando respiciat: faciat quotidie aliquid, an semel fecerit: pars mundi sit, an mundus: liceat illi hodieque decernere, & ex lege fatorum aliquid derogare: an majestatis diminutio sit, & confessio erroris mutanda fecisse?... Quam utile existimas ista agnoscere, & rebus terminos ponere: quantum Deus possit, materiam ipse sibi formet, an data utatur: utrum idea materiæ prius superveniat, an materia idea: Deus quidquid vult, efficiat; an in multis rebus illum tractanda destituant, & a magno artifice prava formentur, non quia cessat ars, sed quia id, in quo exercetur, sapè inobsequens arti est? Hæc inspirare, hæc discere, his incumbere, nonnè transilire est mortalitatim suam, et in meliorem transcribi sortem? „Seneca in pref. ad QQ. Nat.

CAPUT PRIMUM.

De Existentia Dei.

599 **E**ns necessarium est id, quod *Deum* nuncupamus, Ens supremum principium, ac ratio sufficiens rerum omnium „art. 140. Hæc est definitio nominis” (Log. 56), quam ad præsentem tractationem usurpare placuit, eo quod jam art. citato prædicta sint fundamenta, quibus hæc notio dilucidè intelligi queat. Fuerunt tamen nonnulli, ac etiamnum extare non dubitamus, qui rem hac definitione significatam verbo tenuis inficiari, ac aliis eamdem impietatem persuadere tentarunt. Dixi verbo tenuis; nec enim umquam crediderim, aliquid esse in natura monstrum adeo efferatum, quin unquam auctorem suum cognoverit: semperque dixerit *in corde suo: non est Deus*. Seneca enim teste: *Mentiuntur, qui dicunt se non sentire*